

# Wethule ekhuluma ngempilo yakhe owoKlebe

## FANELESIBONGE BENGU

YETHULWE ngokusemthethweni eThekwini incwadi yomkhulumeli woKlebe ekhuluma ngempilo yakhe ebizwa ngokuthi *My Father My Monster*.

Le ncwadi kaMcIntosh Polela ethulwe eDurban University of Technology (DUT) lapho ayefunda khona, ikhuluma ngokukhula kwakhe nodadewabo kanzima behlukunyezwa nguyise.

UPolela uthe waqala ukubhala le ncwadi ngo-2008 ngemuva kokubuya eLondon lapho ayeqhuba khona

izifundo zakhe zobuntatheli.

Uthe ngesikhathi ebuya wahlangana noyise eyomtshela ukuthi uyamxolela ngokubulala unina kodwa uyise wangakhombisa kuzisola.

Uthe kungaleso sikhathi lapho athi akasafuni okuzomhlanganisa naye

“Bengingeke ngiqhubeka nempilo ukuba angizange ngibhekane nobuhlungu bami,” usho kanje.

UPolela wazalwa enguSteven Shezi kanti wazishintsha ngemuva kokuthola ukuthi uyise wabulala unina. Njengoba wayezoba yintatheli, wazishintsha igama ukuze uyise angamtholi wazibiza ngoMcIntosh okuyigama

alithola kumculi we-reggae uWinston Hubert McIntosh. Ngaphandle kwalokho washintsha nesibongo sikanina wazibiza ngesikayise uNzimande.

Lesi sibongo wasishintsha ebuya phesheya ebona uyise ekhombisa ukungazisoli ngesenzo sakhe waba uPolela okuyigama lomfula wangakubo.

Uthe ngemuva kokuqala ukubhala le ncwadi waya emndenini kayise wawutshela ukuthi ucabanga ukubhala incwadi wamnika izibusiso kanti uyise wathi akanandaba.

Uqhube wathi unobudlelwano obuhle nomndeni kayise.

“Angizwani nobaba futhi ngicabanga ukuthi kuhle kunjalo,” usho kanje.

Uveze ukuthi usazoqhubeka nokubhala ezinye izincwadi kodwa hhayi ngaye.

Kulo mcimbi bekukhona iPhini likaShansela waseDUT uSolwazi Ahmed Bawa othe bayaziqhenya ngoPolela, Adv Robin Sewlal oyiNhloko yeziFundo zobuNtatheli, othisha bezobuntatheli nabanye abebekulo mcimbi.

